



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola LXXXV. Gregorii Papae I. Ad Benenatvm Episcopvm Fvndaritanvm.
Vt oratorium in honorem sanctorum Seuerini & Iulianae consecret.

urn:nbn:de:hbz:466:1-15221

EPISTOLA LXXXIV.

GREGORII PAPÆ I.

AD FANTINVM DEFENSOREM PANORMITANVM.

De molestia Ianuariæ ab Anastasio.

Gregorius Fantino defensori Panormitano.

IANVARIA præsentium latrrix maximam se molestiam ab ingenuo Anastasio atque Bonifacio contra iustitiam pati commemorat, adeo ut de possessione, quam per plurimos annos asseritur possedisse, eam, sicut ipsa ait, nitantur expellere. Et quia contra eos se ecclesiastica debere petitione defendi, experientia tua prædictos viros ad se euocet, eosque admoneat, ut illi mali facere nihil præsumant. Sed si quid sibi contra superscriptam mulierem credunt iuste posse competere, iudices cum ea eligant, & quæ inter eos fuerint diffinita tuo pro quiete partium solatio compleantur. Si vero eos differre cognouerit, antefata mulieri, salua æquitate, tuitionem impendat, & eam contra rationis ordinem nullo modo grauari permittat.

EPISTOLA LXXXV.

GREGORII PAPÆ I.

AD BENENATVM EPISCOPVM FVNDARITANVM.

Ut oratorium in honorem sanctorum Seuerini
& Iulianæ consecret.

Gregorius Benenato episcopo Fundaritano.

IANVARIA religiosa femina petitoria nobis insinuatione suggessit, quod habetur in subditis, in massa Furiana iuris sui oratorium se pro sua deuotione fundasse, quod in honorem sanctorum Seuerini confessoris & Iulianæ martyris desiderat consecrari. Et ideo, frater carissime, si in tuæ parochiæ memorata constructio iure consistit, & nullo corpus ibidem constat humatum, percepta primitus donatione legitima, id est, in reditu præstantes liberos a tributis fiscalibus solidos decem, gestisque municipalibus alligata, prædictum oratorium absque Missis publicis solenniter consecrabis, ita ut in eodem loco nec futuris temporibus baptisterium construatur, nec pre-

sbyterum constituas cardinalem. Sed si Missas ibi fieri superscripta conditrix forte voluerit, a dilectione tua presbyterum nouerit postulandum, quatenus nihil tale a quolibet alio sacerdote nullatenus praesumatur. Sanctuaria vero suscepta sui cum reuerentia collocabis.

EPISTOLA LXXXVI.

GREGORII PAPÆ I.

AD FORTVNATVM EPISCOPVM NEAPOLITANVM.

Ianuariae reliquias sanctorum Seuerini & Iulianae dare iubet.

Gregorius Fortunato episcopo Neapolitano.

IANVARIA religiosa femina sanctuaria beatorum Seuerini confessoris & Iulianae martyris oblata petitione sibi postulat debere concedi, quatenus in eorum nomine oratorium propriis sumptibus constructum possit solenniter consecrari. Et ideo, frater carissime, praefatae Ianuariæ desiderii ex nostra te præceptione conuenit obedire, ut deuotionis suæ, in consecratione quā postulat, potiatur effectu.

EPISTOLA LXXXVII.

GREGORII PAPÆ I.

AD CONSTANTIVM EPISCOPVM MEDIOLANENSEM.

De reliquiis sanctorum Pauli apostoli, Ioannis & Pancratii martyrum.

Gregorius Constantio episcopo Mediolanensi.

LATOR praesentium Euentius diaconus fraternitatis vestrae nobis talia intimaui sibi a vobis iniuncta, ut reliquias beati Pauli apostoli, sed & beatorum Ioannis & Pancratii per eum ad vos dirigere deberemus. Quam petitionem vestram curauimus effectui mancipandam. Fraternitas ergo vestra solito studio perscrutari non differat, quatenus in locis quibus recondendae sunt luminaria vel alimoniae ibidem seruientium ante dedicationem loci ipsius debeant erogari, & tunc in eisdem locis directa sanctuaria sui cum reuerentia collocentur; ne loca Deo dicata, si praedicta prouisio omissa nunc fuerit, futuris temporibus destituta, quod absit, seruientium reperiantur obsequiis.